

"SA FESTA DE SANT'ASILI"

NUGHEDU SANTA ITÒRIA

Sant'Asili Mannu Dotore est unu novenàriu in su sartu situau a 2 km de sa bidda de Nughedu Santa Itòria. Sa cresia est istada fraigada in istile tardu goticu - catalanu in su 1600, presentat unu pòrticu aguantadu dae oto columnas in unu fiancu e sos tìpicos muristenes in s'àteru.

Sa festa:

Totu cumintzat su 24 de austu, cando a manzanu chitzo sos nughedesos si movent cun su santu chi de sa crèisia de Santu Jacu che calant Sant'Asili a su novenàriu in crufessone e at abbarrare inie fintzas a su primu de cabudanni.

Sa festa religiosa est aprontada dae sos oberajos sutta sas disposiciones de s'oberaju mazore, chi de annu in annu benit isseberau dae s'oberaju mazore de s'annu prima.

In sa corte, a parte sa bella crèisia, funt presentes sos muristenes chi benint dados cun una oferta a su santu a sos chi ddos cherent pro sas nuinas, cando ch'at zente meda chi ddos cherent benint dados cun una estratzione a sorte.

Sa devotzione pro su santu no est una cosa chi est mesches pro sos nughedesos ma ddu at una bidda chi faet onzi annu su pellegrinàggiu a pè, e custos funt sos silanesos chi de Silanus partint su 30 austu a manzanu pro imbàtere su 31 sero a su novenàriu de Sant'Asili.

Sa note de su 31 de austu benit muttida sa "note de s'izadorzu"; si chenat inie gràtzias a su traballu de sos oberajos, chi cumbidant sa chena a sos nughedesos e a sos silanesos chi funt bennios, e si abbarrat totus paris fintzas a manzanu.

Su primu de cabudanni est sa die chi serrat sa festa; cadderis fusileris e meda zente fintzas istranza benint a che accumpanzare su santu chi torrat a bidda, sa crufessone benit fata a su sero a pustis de sa cunsegna de sas pandelas. Una borta imbatios a bidda a s'acabu de sa missa su predie lezet sos oberajos noos e su mazore pro s'annu chi enit.

LAUDES IN ONORE E SANT' ASILI

Claru sole de Oriente,

de divinu risplendore,

favoride custa zente

Basile magnu Dotore.

Favoride ecc.

In Capadoccia naschidu,

Fertile logu e terrenu,

De Gregòriu Nanzianzenu.

Giustamente illustre nidu,

Ambos in ie ant fioridu

Cun literas de valore.

Favoride ecc.

Send'in gioventude apena

In sos istùdios mazzores,

Istettis in Athena,

Po esemplare a sos dotores,

Impugnende sos errores

De s'erege ingannadore.

Favoride ecc.

Cun caritativu prontu

Cherinde a totus salvare,

Andestis a preigare

S'Evangelu a sos de Pontu,

Ue eredges sena contu

Cumbintos lassant s'errore.

Favoride ecc.

S'altu Segnore Inreadu,
A sa patria Bos torresit,
Pro chi Bos predestinesit
De Cesarea Preladu,
Pastore tantu esaltadu
In caridade e fervore.

Favoride ecc.

Totus sos Anacoritas,
Chi bivant in cuss'edade,
Lo fetestis traslutare
In perfetos Cenobitas,
Lassende in sos eremitas,
De sos desertos s'errore.

Favoride ecc.

Tenzistis tanta potèntzia,
In sos Chelos e privantza,
Alcanzada cussa lantza,
De sa santa penitènzia
Presentatebos ubbidèntzia
S'infernale gherradore

Favoride ecc.

Pro portare a salvazione
Su mundu, che Noè, in s'arca,
Bos fatesit Patriarca
De sa santa religione

Su Altu Rè de Sione
De chelu e terra Segnore.

Favoride ecc.

Saezis Elia in su zelu,
Moisè in sos portentos,
Pro cussu sos elementos
Bos obèdin cun desvelu
Sos dimònios senza velu
Bos rispetant cun timore.

Favoride ecc.

S'imperadore valente
Mostru orrendu de s'iferru,
Sentenziesit a disterru
Custu sole risplendente
Su Signore Onnipotente
Ddu defendet cun valore.

Favoride ecc.

Cando istetis pro firmare
Sa sentenzia inicuamente,
Benit ispantosamente
Sa manu a si li sicare
Sa cadira a si segare
Cun ispantosu istupore.

Favoride ecc.

Fistis pasmu in astinenzia,
Portentu in sa caridade,

Prodìgiu in sa penètentzia,
Sugetente a s'ubidèntzia
Su corpus a su rigore.

Favoride ecc.

Istetis veru retratu
De sos antigos Profetas
De sas Virginis perfetas,
Vivu simulacru fatu,
Lizu Virginale intatu
De vivissimu candore.

Favoride ecc.

Finalmente coronadu
De singulares vitòrias,
Galas, virtudes e glòrias
Sos Chelos bos at cantadu,
Hue Deus Bos at dadu
Assentu de grandu onore.

Favoride ecc.

Fenis de divinu amore
Sole amenu risplendore
Favoride custa zente,
Basile Magnu Dotore.